

in memoriam

Mnr JM (Jan) Bakkes (64) van Stellenberg. Oudinwoner van Huis Marais. Verwerf sy BSc in 1961, SOD in 1962 en sy MEd in 1983. Oudskoolhoof in Molteno, Franschhoek en van die Hoërskool Brandwag, Uitenhage.

Dr JJ (Koos) Barnard van Mosselbaai. Oudinwoner van Huis Visser – 1945. Verwerf sy BSc in 1949 en daarna 'n diploma in Openbare Higiëne in 1951. Hy het in die departement Waterwese gewerk en het in 2002 op Mosselbaai afgetree.

Mev HC (Hettie) Beder (née Krichner) (91) van Lynnwoodrif, BA in 1934, SOD in 1935 en DOSK in 1936. Oudinwoner van Harmonie waar sy ook primaria was en tot kort voor haar dood aktief in die Willow Haven Aftreeoord waar sy onder meer 'n Biblioteek opgebou het.

Mev SC (Sannie) Bellingan (née Crafford) (48) van Hermanus. Oudinwoner van Heemstede. Verwerf haar BComm in 1976 en haar HOD in 1978.

Mnr OD (Oscar) Beukes (43) van Idasvallei, Stellenbosch. Oudinwoner van Pieke. Voltooi sy BA-graad in 1999. Was werksaam by Parmalat, Stellenbosch. Oorlede 29 Mei 2004.

Dr ANG (Arnold) Blumer (58) van Stellenbosch. Dr Blumer het aan die Universiteit van Kaapstad studeer waar hy ook doseer het. Het in 1976 by die US aangesluit. Hy is in 'n Britse interneringskamp by die huidige Harare, Zimbabwe, gebore waar sy ouers, Duitse sendelinge in die destydse Tanganjika (nou Tanzanië), aangehou is.

Hulle het later in Kaapstad gewoon en hy het sy skoolopleiding in Duitsland voltooi. Hy het 'n goeie kennis van musiek en veral die teater gehad en het gedien in die komitee wat oor die toekening van die Fleur du Cap-toneelpryse moes besluit. Met sy vertalings uit Duits in Afrikaans wou hy verseker dat Afrikaans kan "saamgesels" met die wêreld-letterkunde. Onder die werke wat hy vertaal het, is die teaterstukke van Brecht in Afrikaans asook Gunther Grass se boek *Kreeftegang* wat vroeg in Maart vanjaar op Stellenbosch bekendgestel is. Andersom het hy ook die Afrikaanse romans *Vatmaar* en *Afdraai* van AHM Scholtz in Duits vertaal en sodoende die Griekwakultuur aan Duitse lesers bekendgestel.

Ds LP (Lourens) Conradie (60) van Senekal. Na 'n aantal jare in die sakewêreld skryf hy in 1979 aan Universiteit Stellenbosch in en hy behaal sy B.Th in 1981 en sy Lisensiaat in Teologie in 1982. Hy het 1981-1982 op die TSR gedien was in sy vierde jaar klasprimarius. In 1983 is hy in die NG Kerk Burgerspark in Pretoria georden en was daar werksaam tot Junie 2000.

Mnr TA (Tom) Conradie (78) van Linden, Johannesburg. Verwerf sy BSc Ing in 1956 aan die US.

Regter WE (Wilfred) Cooper (78) van Howard Place. Oudinwoner van Dagbreek – 1945. Verwerf

sy BA-Regte aan die US in 1947

Ds GM (George) Daneel (100) van Franschhoek. Oudinwoner van Wilgenhof. Oudste Springbokrugbyspeler. Hy was 'n leerling van Paul Roos en het Teologie aan die Universiteit van Stellenbosch studeer. Was kapelaan vir die troepe in Noord-Afrika en het bedank uit die NG Kerk om hom aan te sluit by Morele Herbewapening.

Mev JE (Juliana) de Villiers, afgetrede hoof van die Klavierafdeling in die Departement Musiek. Sy was 'n inspirerende klaviersdosent, beoordeelaar van verskeie kompetisies, solis en begeleier vir onder meer radio- en TV-opnames.

Mnr JJ (Hannes) de Wet (74) van Robertson. Oudinwoner van Wilgenhof. Voltooi die graad B.Sc in Landbou in 1953.

Mnr EP (Ted) Evans (76) van die Paarl. Oudinwoner van Helderberg – 1947. Verwerf sy BSc-Landbou in 1951 en sy MSc Argic in 1953.

Mnr TF (Tom) Fourie (81) van Stellenbosch. Oudinwoner van Dagbreek. Voltooi sy BA in 1943 en sy SOD (nagraads) 1944. Was 'n kranige skrumskakel vir Dagbreek, Maties, Van der Stel, Boland, Diggers (Johannesburg) en WP.

Prof GS (Sedon) Harrison, (75) van St James, verwerf sy PhD aan Wits en 'n tweede doktorsgraad aan Cambridge, sluit in 1983 by die destydse Departement Chemiese Ingenieurswese aan en word departementshoof in 1984 en beklee die posisie tot sy aftrede. Hy word onthou vir sy ywer om die programme in chemiese ingenieurswese uit te bou tot programme wat wêreldwyd erkenning geniet en gehalte van graduandi wat gelewer word. Was verskeie kere raadslid en ook president van die Suid-Afrikaanse Instituut vir Chemiese Ingenieurs en 'n genoot van SAIChI en IchemE. Hy was wyd-belese en Afrikaans, Engels, Duits, Frans, Italiaans, Japannees, Portugees, Grieks en Latyn magtig.

Mev JM (Marcha) Hartwig (83) van Stellenbosch. Vrou van prof Gerhard Hartwig, voormalige dekaan van Bosbou. Verwerf haar BA in 1940 en later haar MA (Engels). Sy word oorleef deur prof Hartwig (90) wat in 1979 afgetree het.

Mev Alta Hugo (85) van Stellenbosch, oudpersoneellid van Administrasie.

Mev EL (Evansa) Hugo (51) van die Paarl (née Helm). Oudinwoner van Heemstede, BA in 1974, HOD in 1975, onderwys gegee op Mooresburg, Pretoria, Nelspuit en die Paarl. Professionele tennis-afrigter in die Paarl van 1986 tot 2004.

Mnr (Jan) Kelder (90), van Stellenbosch. Was van 1941 tot sy aftrede op 31 Desember 1978 dosent in liggaamlike opvoedkunde (nou Sportwetenskap) aan die US. Hy is in 1913 in Assen, Nederland, gebore, en is in liggaamlike opvoedkunde aan die Akademie in Den Haag opgelei en het 'n diploma in swemonderwys van die Koninklike Nederlandse Swemverbond verkry.

In 1939 het hy en sy vrou na Suid-Afrika gekom. Nadat hy vir 'n tyd lank op Ermelo en Bethal skoolgehou het, is hy in Maart 1941 aan die US aangestel. In 1950 het hy 'n SA burger geword. As hokkiegeesdriftige het hy verskeie SA toere Brittanje en Europa toe gelei en hy was lank sekretaris van die SAU hokkie-unie. Hy het verskeie referate oor sportgeskiedenis by internasionale kongresse aangebied, het gereelde werksbesoeke aan 'n aantal Europese stede afgelê en het onder meer *Dis swemtyd!* geskryf en het 'n aantal artikels in vaktydskrifte en ander blaaië gepubliseer.

Mnr JL (John) Klaaste (28) van Blue Downs. Oudinwoner van Oude Molen. Verwerf sy BEcon in 1995 en sy Hons BEcon in 1996.

Prof JW (Charlie) Koen (66) van Somerset-Wes; MSc in kernfisika, DSc in eksperimentele kernfisika. Sluit by die US in 1964 aan as dosent in fisika. Benewens sy navorsingsbydraes was hy 'n gewilde en vernuwende dosent. Hy speel ook 'n leidende rol in die uitbouing van die fisika deur IWWOUS, 'n program vir die vestiging en ontwikkeling van natuur- en skeikunde onderwysers. Hy was ook 'n konsultant oor terminologie in fisika vir die WAT.

Ds AIM (Alwyn) Kriek (73) van Garsfontein was agtereenvolgens predikant in Eshowe, Daniëlskuil, Ogies, Voortrekkerhoogte (as kapelaan) en Primrose-Môrewag. Hy het aan UP, UOVS en US studeer waar hy die grade BA, MA en BD onderskeidelik behaal het. Met sy afsterwe het hy in Pretoria gewoon.

Mnr JP (Joachim) Louw (55) van Porterville. Oudinwoner van Dagbreek vanaf 1968-1970. Verwerf sy BComm in 1972 aan die US.

Mnr RA (Reginald) Louw (43) van Durlanden. Verwerf sy BRek en BRek Hons, beide cum laude 1981 en 1982 onderskeidelik. Was vanaf Julie 1989 as rekenmeester by Sanlam se Beleggingsafdeling werksaam.

Mr F (Frank) Lyons (70), from Somerset West, worked as glassblower at the Chemistry Department and coached the Maties soccer team for many years. He and his family immigrated to South Africa in 1962 and he joined the University in 1977.

Mej E (Lilly) Malherbe (28) van Klein-Drakenstein. Oudinwoner van Monica. Voltooi haar BA in 1997 en Hons.BA in 1998.

Mnr CC (Carel) Marincowitz (81) van Somerset-Wes. Inwoner van Dagbreek in 1943. Verwerf sy BSc in 1944 en sy BSc Ing in 1945.

Prof S (Siegfried) Maske (76) van Westcliff, Johannesburg. Oudinwoner van Dagbreek. Verwerf sy BSc in 1948, sy MSc in 1951 en sy DSc in 1964.

Prof LM (Lucas) Mbadi (72) van Qumbu in Transkei, Oos-Kaap; het in 1983 MA in Afrika-tale met lof aan die US behaal; was studente-